

四明叢書

張宗祥



拘虛後集序

吾鄉石亭先生陳公天賦逸才早窮詩窟由弱冠挾藻
卽揚芳藝林一時學士不敢並駕閒嘗檢其自家食至
登殿講巡方岳以來諸橐中極菁華合作者彙爲五卷
名曰拘虛集藏之篋笥不欲示人往門人在當路者固
請而讀之遂私刻於東昌五卷中諸體略備然僅僅數
十百首今流之海內識者爭寶不啻靈蛇之璧然可謂
絕詣也已乃後歸田之作甚富自公觀化以來久而未
有傳者季子叔行暇日與二三作者乃選訂數十篇附

前五卷以行或謂太簡叔行曰言不貴多惟美則傳先
君舊記之矣吾今何以多爲刻成屬穀以序穀捧誦旣
久乃僭論曰公書記五車文究百代取才盛世證體大
家良不可及然非有淵深自得之學有優柔和中之襟
則吐詞宣韻安能隨時設象因物抒情若是乎曲中哉
今夫學士文人何代不生顧窮約者其詞戚顯達者其
詞詡放退者其詞懟厥趣淺矣詞卽工君子謂之陋觀
公前詩典重俊雅博大渾雄體裁不苟興致俱深昭哉
弘矣及覩茲刻則又蕭散冲夷優閒靜適絕無憤懣不

平之氣干乎其閒譬之長松野鶴翛然林莽之中絕遠
汙濁又何慕焉噫嘻深哉昔人評公詩曰古體似漢魏
長篇不讓太白近體諸作直在開元之閒誠爲得之乃
穀則曰和而不流怨而不怒公之性情粹美蓋合於風
人者尤多叔行工詩克紹此舉極稱善繼或者以穀言
爲然乃公高文鉅述上逼二京者更僕未盡行將次第
梓傳以茲論詩故不敘嘉靖壬戌秋七月朔前中順大
夫南京太常寺少卿通家晚學許穀謹序

拘虛後集卷一

明鄞陳沂魯南撰

遂初齋四首

抽簪甘老棄卜築水西頭
小苑江春入虛簷海曙浮
苔痕雙屐齒花影半簾鉤
盡日無朋侶時同獨鶴游
僻巷離囂俗孤栖近老禪
門開修竹裏徑掃落花前
畱客清宵坐攤書白日眠
養生無善術飲酒自年年
茅堂淮水外不異灤西東
草色疏簾雨梅花曲檻風
焚香一室靜揮塵萬緣空
敢謂懷高尚其如老病慵

吾愛吾廬好偏宜老去安藤牀隨意設花徑逐時看翻
帙朝餐後烹茶午夢殘見人殊懶慢散髮竹皮冠

登牛首山寺

碧嶂凌雙闕丹梯繞四天松門心出世蘿洞足安禪谷
靜鐘聲應山明塔影懸澄江萬里外一望極風煙

憩幽栖寺尋翻經閣訪達師

古檜空堂靜虛巖小閣明雲畱坐禪影風落誦經聲蓮
社攢眉入柴關禁足迎山樛中已朽誰識自合生

從牛首緣山過西風嶺尋寧海寺

花宮何處是峯外更高峯細細雲中路陰陰石上松見
巖知佛窟禮塔得禪宗一任經灰劫青山未改容

飯幽栖寺

歷劫招提古倚空松檜長鈴風山應響鉢水澗生香法
演三車地禪栖六祖堂至今祇樹下花散鳥銜將

崇因寺古曇

顧況山中住尋山更幾層其來修淨土見說有高僧座
上光明鏡堂前不滅鐙伽衣三百眾合掌禮盧能

祝禧寺福全

朝渡北溪水晚棲南嶽峯雨中烹紫筍雲裏種青松但
識來時意無尋去後蹤石橋南北路一笑是相逢

天界寺果斌

佛園祇樹下坐滿眾僧徒一唱來靈鷲羣迷散野狐匣
中藏慧劒衣上解明珠更向從頭看從頭件件無

長兒時萬會試北上二首

綵服雪中去錦衣天上行青雲須努力白髮若爲情貴
保松筠操無欣桃李榮弟昆相送意惟欲振家聲

垂老憐衰邁飛黃美壯行登庸雖所望聚散復關情臘

盡猶含凍春回擬向榮
禁城楊柳色深處聽鶯聲

乞休再疏始得俞旨識喜二首

病疏空連上從誰悉此情
就途憐力憊待命祇心驚
塞靜胡笳動霜寒牧馬鳴
聖皇衰老朽不遣鴈門行
犬馬慚無報乾坤賴有容
一朝存散地萬里付幽蹤
青鳥海中路白雲天外峯
未嘗離世境仙伴坐相逢

漫興

獻璞當年出今懷白璧歸
尙餘松檜楫未老芰荷衣
林靜鳥無語山閒雲不飛
此中空寂久那復問禪機

華巖北峯坐眺

徙倚北峯上長歌對夕暉
松聲喧梵唄野色覆伽衣
石溜銜階落山雲拂殿飛
更躋臨木杪清磬出巖扉

幽栖寺遇海天禪僧

邈矣傳鐙後巍然講座前
花飛看世界雲去說因緣
有象皆成業無心卽是禪
更甯明月影長照海中天

重游天寧寺次華玉韻

重游仍孟夏草木已繁陰
愛此棲禪地悠然遺世心
峯巒迴處合林壑坐中深
日入鳥聲息惟聞笙笛音

劉司空自溧陽來見訪病中贈謝一首

老翁多病北山臥有客高情南坦來不得逢迎如倒屣
尙能扶坐共銜杯江湖久絕一朝見風雨劇談終夜陪
烈士暮年心未已司空閒卻濟川才

馬太史仲房見過喜作

文學關西重馬融翰垣供奉十年同林驚落葉從風散
書寄飛鴻向晚通使節遠臨寒雪後朋簪高會大江東
相思欲話無窮事一笑都忘樽酒中

王道思禮部過訪畱作次答一首

春半猶寒花未開竹閒惟見數枝梅正思何遜題詩到
恰遇王猷直造來頗愛風流殊絕俗不嫌麤糲共銜杯
交游海內懷知己老去逢君有俊才

出郊郭人山寺

巖城迢遞復崔嵬關吏相迎向曙開旌節昔曾揚策去
薜蘿今是挂冠來亂雲高處危峯起蔓草中閒細路回
出處自憐聞道晚假年還借讀書臺

幽栖寺納涼遂宿行窩

牛頭山裏覓禪宮伐鼓鳴鐘咫尺通初見佛香飄細靄

更聞仙梵下微風樓臺坐近諸天上草木行吟大地中
到處高峯畱一榻夢回常臥半虛空

田莊新酒熟漫興

歲辦田家麴米錢瓦盆盛酒醉春前柴門雪色餘殘夜
草閣梅花寄隔年老去幾人能作伴病來一室似安禪
青山少待身強健欲盡登臨未了緣

入翠屏山

天外羣山高且重西南更出兩三峯白雲青靄互相合
激石亂流時自春行入飛蘿千尺磴坐臨幽徑萬株松

一聲清磬隔林杪知是頭陀寺裏鐘

送王元簡會試

家世文章不乏傳里中登榜尙英年
遺經善說梁邱易
秀句能爲杜曲篇
拾芥功名須自信
看花朋輩許誰先
而翁未了虞廷事
准擬夔龍在後賢

懷劉司空元瑞

高情蕭散占三州
白下纔過不少畱
徃歲每多臨賞地
經年惟有別離憂
桓伊江上風傳笛
孫楚洲前月滿樓
無限相思遙寄語
鴈聲來去自春秋

懷文待制徵仲

杳然林壑在人閒爲別多年似絕攀不獨朋交傷白首
每緣游興憶青山門前蠟屐焉能至溪上蘭舟詎肯還
欲待乘春同訪勝劒池崖石坐潺湲

懷薛吏部君采

風塵路塞久懸車南北從誰問索居垂代豈須揚子易
終年何愛老聃書地連禹甸長河外春入濠梁落木餘
聞道琅邪山色勝訪同嵩嶽意如何

丁酉除夕

爆聲雷動千門列烈火煙橫萬戶連坐久歲分將盡夜
起來人拜古稀年梅調玉鼎山中相椒薦瑤尊地上仙
老少歡娛三世共太平歌頌一家前

拘虛後集卷一

拘虛後集卷二

明鄭陳沂魯南撰

自述二首

索居書已報離羣便與人閒事不聞草木山中隨腐朽
風雲天上自紛紜晝眠灑灑敲林竹晚飯青青出澗芹
日月照臨同下土白頭瞻望敢忘君

衰遲本意去三齊月皎驚烏不得棲栗里未忘荒菊徑
草堂空在浣花溪朝廷欲補誰袞袞塞頻傳自鼓鼙
便效馳驅吾老矣感恩羸馬只長嘶